



Mintga instrucziun entscheiva cun ina lecziun da savida generala.



L'emprena classa da Mbara Ozioma cun ils scolasts, il vicedirectur dall'ambassada svizra Daniel Cavegn ed Ozioma Nwachukwu, fundatur e president.

FOTOS MAD

Umunumo tenor il sistem dallas scolas professiunalas svizras

■ (cp) Ord las neblas ed en l'aua freida – senza experienscha pratica – ston ils giuvens Nigerians entscheiver lur veta professiunala. En las scolas dil stadi vegn ei mo empru teoria, ei dat strusch uaffens e maschinas. Ed ils menaschis prendan negins emprendists. La scola da Mbara Ozioma ad Umunumo, el sid dalla Nigeria, va ussa novas vias. Si' instrucziun sedrezza suenter il sistem svizzer dalla scolaziun professiunala duala. Il di d'admissiun han tut ils scolars dalla scola professiunala da Mbara Ozioma purtau robas academicas. Quei ei usit ella Nigeria e fa part dalla seramentaziun festiva. Ils 24 novs scolars, denter els era treis scolaras, han engirau da s'engaschar cumpleinamein a lur scolaziun e s'integrar bein ella cuminonza dalla scola.

La cerimonia d'admissiun dil scolars



Daniel Cavegn, il vicedirectur dall'ambassada svizra, salida il representant dil departament d'educaziun dil stadi Imo en il sid dalla Nigeria.

ad Umunumo miez settember ei era stada il punct da partenza dalla scola professiunala da Mbara Ozioma. Dalla fiasta d'avertura ha bia prominenzia priu part. Denter auters ei era Daniel Cavegn, il vicedirectur dall'ambassada svizra, viaggiaus dalla capitala Abuja ad Umunumo. Plinavon ha in official dil departament d'educaziun purtau il salid dil guvernatur dil stadi Imo. Las visetas prominentas han accentuau l'impurtonza dil niv standard da scolaziun che Mbara Ozioma porta alla regiun el sid dalla Nigeria.

Dapli experienscha pratica che en las scolas dil stadi

Las scolaras ed ils scolars dalla scola professiunala da Mbara Ozioma fan els proxims treis onns ina sort emprendissadi da scri-nari. Il plaid emprendissadi seigi giustificaus pertgei els vegnien buca mo a seser sil baun da scola, mobein era luvrar el luvratori. Quei cuntrari allas scolas statalas nua ch'ei vegn empriu quasi mo ord

ils cudischs, buc il davos ord munconza d'uaffens e pervia da maschinas che funcziunan buc. Ils scolars da Mbara Ozioma survegnan plinavon experienscha professiunala entras in praticum tier in mistregner ni ina firma dalla regiun. Quella cumbinaziun denter teoria e pratica sedrezza suenter il sistem d'emprendissadi dalla Svizra nua ch'ils emprendists frequentan la scola professiunala durant ch'els lavuran en in menaschi. Cun quei sistem dual dalla Svizra dueien las scolaras ed ils scolars dalla Nigeria daventar mistregners da vaglia.

Planisau cuors per electricchers e luvrers da metal

Cun gl'empren cuors da scri-naris ei l'entschatta dalla scola professiunala da Mbara Ozioma gartegiada. Per quell'emprena etappa han amitgs, fautors ed instituziuns digl agid da svilup investau rodund 600 000 francs. Cun quels daners han ins construui dapi igl onn vargau in baghetg da duas alzadas per scola ed administraziun ed ina gronda halla cun uaffens e maschinas dad aulta qualitat. La nova scola da Mbara Ozioma ha era creau sis novas piazzas per scolasts ed administraziun ad Umunumo.

La classa per scri-naris duei denton buca restar il sulet mistregn ad Umunumo. In'ingrondaziun dalla scola ei gia planisada. Sper ils scri-naris vul Mbara Ozioma era porscher in cuors per luvrers da metal (stagner, fravi) ed in cuors per electromechanichers. Aschia vegn ei a dar 40 ulteriurs plazs da scolaziun ed ei sto vegnir baghegiu in ulteriur luvratori ed in baghetg per ils scolars. La realisaziun da quels plans pretenda puspei in grond engaschi persunal e finanziar davart dil amitgs e fautors da Mbara Ozioma.



Daniel Cavegn, il vicedirectur dall'ambassada svizra ed Ozioma Nwachukwu, fundatur e president dalla scola professiunala, durant la seramentaziun dad ina scolara.



En quei baghetg cun duas alzadas dat ei buca mo spazi d'instrucziun, mobein era combras d'habitar pils scolasts che vegnan da loghens lontans.



Era en la Nigeria ei il mistregn da scri-naris buca mo reservaus als umens: Daniel Cavegn, il vicedirectur dall'ambassada svizra, cun scolaras e scolars dalla scola professiunala da Mbara Ozioma.



In grond luvratori cun uaffens e maschinas ei ina excellenta purschida per far experienschas da lavur.



Las maschinas ed ils uaffens ein arrivai (foto zercladur 2014). Tut ils indrezs ein vegni cumprai ell'Africa dil vest per garantir il servis e la furniziun da tocca da reserva.

Gudignar bials premis e sustegner Mbara Ozioma

Per realisar ulteriurs cuors ed instrucziun alla scola professiunala ad Umunumo organisescha l'unium da fautors da Mbara Ozioma in lotto da benefeci. El ha liug ils 18 d'october allas 20.00 el center da sport a Mustér. La vendita da cartas entscheiva allas 19.00. Da gudignar dat ei bellezza premis sco in auto Hyundai i.20, in e-bike ni ina televisiun da 50 zol.